

ipsi honorem ac gloriam esse tantummodò tribuendam cognoscent. Quare alacri animo ad maximum sustinendum onus accedimus, & quo potentiore auxilio fidimus, eo majore studio connitimur, & ob ipsam muneris, ad quod appellati sumus, præstantiam, nullas, quæ à Nobis in eo perfungendo conferri possunt, sedulitatis ac industriæ partes nimias esse judicamus.

Quam quidem administrationis Nostræ rationem dum assidue versamus animo, atque ex hac altissimâ Apostolicæ Sedis speculâ in omnes Christiani Orbis regiones oculos convertimus, Vos potissimum, Venerabiles Fratres! excelso & illustri loco positos intuemur. Vestro conspectu recreamur, Vos Adjutores Nostris, Vos Dominici Gregis Custodes ac Evangelicæ Vineæ Operarios summâ animi Nostræ jucunditate agnoscimus. Qui igitur Nostræ sollicitudinis partem sustinetis, in ipso Apostolatûs Nostrî exordio alloqui Vos maxime cupimus, atque in sinum vestrum intimos mentis Nostræ sensus effundere; & siquid Vos in Domino hortari ac commovere videbimur, id vel Nostris de Nobis ipsis timori tribuite, vel profectum à vestra virtutis, ac in Nos pietatis fiducia existimare.

Ac primum rogamus Vos, Venerabiles Fratres! ac obsecramus, ne unquam misericordiarum Patrem pro imbecillitate Nostrâ Divino præsidio muniendâ deprecari intermittatis. Reddite hanc Nobis amoris erga vos Nostrî vicem, atque ita mutua præcium vestrarum subsidia Nobiscum conjungite, ut alteri ab alteris quodammodo sustentari firmiori gradu omnes possimus in suâ quisque statione consistere. Hâc potissimum animorum conjunctione illam, in quâ Nobiscum coagmentati estis, unitatem comprobabitis. Unum quippe totius est Ecclesiæ ædificium, cujus in hâc Sede à beato Petro positum est fundamentum. Multi ad illud construendum conjuncti sunt lapides, sed omnes super unâ Petrâ firmantur ac innituntur. Unum est Ecclesiæ corpus, cujus Christus est caput, ac in illud omnes coalescimus. Nos ipsius potestatis Vicariam Procuracionem gerentes cæteris altius illo volente præsidemus, Vos verò unâ Nobiscum colligati tanquam cum visibili Ecclesiæ capite potiores ejusdem corporis partes